

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-92/10  
Sarajevo, 11.2.2010. godine

**Z A P I S N I K**  
**28. SJEDNICE DOMA NARODA PARLAMENTA FEDERACIJE BOSNE I  
HERCEGOVINE, održane 28. januara i 11. februara 2010. godine**

Sjednica je počela u 10.33.

Sjednici je predsjedavao Stjepan Krešić, predsjedavajući Doma naroda Parlamenta Federacije Bosne i Hercegovine.

Na početku sjednice predsjedavajući je pozdravio: delegate, premijera Federacije Mustafu Mujezinovića, zamjenika premijera Vjekoslava Bevanđu, ministre u Vladi Federacije Bosne i Hercegovine, predstavnike međunarodnih organizacija, goste i predstavnike akreditiranih medijskih kuća koji prate rad sjednice.

Izostanak sa sjednice opravdali su: Jasenko Tufekčić, Elvira Abdić-Jelenović, Anto Bilić i Pero Jukić Pop.

Na osnovu evidencije Stručne službe, predsjedavajući je konstatovao da sjednici prisustvuju 44 delegata, što čini većinu, te Dom naroda može raditi i punovažno odlučivati.

Prije prelaska na rad predsjedavajući je upitao delegate da li imaju primjedbi na Zapisnik 27. sjednice Doma naroda, održane 3. decembra 2009. godine i Zapisnik 11. vanredne sjednice Doma naroda, održane 22. decembra 2009. godine.

Josip Perić dao je primjedbu na Zapisnik 27. sjednice u dijelu delegatskih pitanja i inicijativa.

Istakao je da u Zapisniku nije navedeno da je nezadovoljan odgovorom na pitanje u vezi sa uplatom doprinosa preduzeća, odnosno koliki je taj dug, te je zatražio od Federalnog ministarstva pravde i Ureda za zakonodavstvo Vlade Federacije da mu se objasni kako ovaj dug može biti profesionalna tajna. Također, zatražio je dostavljanje spiska svih dužnika koji nisu uplaćivali doprinose i svih dužnika protiv kojih je podnesena prijava.

Predsjedavajući je, uzimajući u obzir ovu primjedbom, Zapisnik dao na glasanje.

Na osnovu rezultata glasanja, predsjedavajući je konstatovao da je Dom naroda, sa 41 glasom za i uz dva uzdržana glasa, usvojio Zapisnik 27. sjednice Doma naroda, održane 3. decembra 2009. godine sa primjedbom Josipa Perića.

Nakon toga su delegati bez primjedbi i jednoglasno (44 glasa) usvojili Zapisnik 11. vanredne sjednice Doma naroda, održane 22. decembra 2009. godine.

Predsjedavajući je podsjetio delegate da na osnovu člana 104. Poslovnika o radu Doma naroda mogu postavljati delegatska pitanja, pokretati inicijative ili izraziti nezadovoljstvo dobijenim odgovorima.

### **Delegatska pitanja i inicijative**

**Ramo Isak** izrazio je nezadovoljstvo odgovorom koji se odnosi na tender vezan uz fizičko osiguranje Lutrije Bosne i Hercegovine.

**Besim Imamović** izrazio je nezadovoljstvo u vezi sa dva dobijena odgovora.

Izrazio je nezadovoljstvo nedonošenjem Zakona o šumama ističući da Uredba o šumama, koju je donijela Vlada Federacije, neće riješiti probleme u ovoj oblasti, te je pozvao Federalno ministarstvo poljoprivrede, vodoprivrede i šumarstva i Vladu Federacije da što prije krenu u rješavanje ovog problema.

Također, izrazio je nezadovoljstvo dobijenim odgovorom na pitanje koje se tiče odgovora vezanog uz "Elektroprenos BiH", tj. da li dogovor entitetskih premijera derogira Odluku Visokog predstavnika vezano uz "Elektroprenos". Zatražio je premijerov stav u vezi sa ovim pitanjem.

Premijer Mujezinović dao je odgovor na pitanje u vezi sa "Elektroprenosom".

**Miro Lazović** izrazio je nezadovoljstvo nedobijenim odgovorom na pitanje u vezi sa imenovanjem federalnog ministra prostornog uređenja, te je pozvao predsjednicu Federacije da što hitnije pokrene proceduru u vezi sa imenovanjem ovog ministra, kako bi se, između ostalog, mogle provoditi kapitalne investicije vezane uz projekte koji se tiču izgradnje Koridora Vc i sl.

**Lidija Bradara** izrazila je nezadovoljstvo dobijenim odgovorom od sekretara Vlade Federacije a tiče se dostavljenog skraćenog transkripta 122. sjednice Vlade Federacije. Postavila je pitanje - prema kojem zakonu ili pravilniku se transkripti sjednica Vlade smatraju povjerljivim, čak i za članove Parlamenta Federacije, te je postavila dva pitanja i pokrenula inicijativu.

Prvo pitanje uputila je Vladi Federacije i Federalnom ministarstvu energije, rudarstva i industrije u vezi sa prihodima od koncesija od rudnika u Federaciji u 2009. godini.

Drugo pitanje postavila je Federalnom ministarstvu za pitanja boraca i invalida odbrambeno-oslobodilačkog rata u vezi sa vršenjem intenzivnih revizija korisnika branitelja i braniteljskih naknada na području općina Travnik, Novi Travnik i Vitez.

Podržala je Inicijativu Besima Imamovića u vezi sa izmjenom Zakona o pripadnosti javnih prihoda.

Pokrenula je inicijativu da Vlada Federacije krene u pregovore sa Vijećem ministara Bosne i Hercegovine kako bi se raspodjela sredstava prikupljenih od nafte i naftnih derivata vodila na jedinstvenom podračunu tako da Federacija i Federalna direkcija za ceste ravnopravnije učestvuju u raspodjeli ovih prihoda, tj. da ne trpe gubitke.

**Josip Perić** izrazio je nezadovoljstvo odgovorom na pitanje o dužnicima za uplatu doprinosa. Zatražio je od Federalnog ministarstva pravde i Ureda za zakonodavstvo Vlade Federacije da mu se dostave podaci o dugu za doprinose.

Izrazio je nezadovoljstvo i nedobijenim odgovorom na pitanje o stanju u Federalnoj upravi civilne zaštite i u vezi sa samovoljom Alije Tihica, direktora Federalne uprave civilne zaštite, i zatražio odgovor o stanju u ovoj upravi, odnosno da li se radi po zakonu. Zatražio je odgovor do naredne sjednice.

Postavio je pitanje Vladi Federacije - šta će učiniti na sanaciji šteta nastalih usljed elementarnih nepogoda – poplava u Tomislav-Gradu.

**Ivo Komšić** izrazio je zadovoljstvo dobijenim odgovorom od Ustavnog suda Federacije Bosne i Hercegovine, koji se odnosi na ustavnost ugovora između vlasnika BBI centra i zakupaca poslovnih prostora u tom centru. Zatražio je da se odgovor Ustavnog suda, budući da se Sud proglasio nenadležnim, uputi Konkurencijskom vijeću Bosne i Hercegovine i ombudsmenu za zaštitu potrošača Bosne i Hercegovine.

Također, pokrenuo je tri inicijative.

Prvu inicijativu uputio je predsjednici Federacije i traži da se pokrene postupak ustavnosti Zakona o položaju vjerskih zajednica u Bosni i Hercegovini.

Druga inicijativa tiče se donošenja Zakona o proslavi vjerskih praznika u Federaciji Bosne i Hercegovine.

Treća inicijativa upućena je Federalnom ministarstvu pravde, a tiče se provjere zakonitosti izvršenja Budžeta Federacije Bosne i Hercegovine u 2009. godini. Također je zamolio da se ova inicijativa uputi odgovarajućoj revizorskoj instituciji.

**Besim Spahić** izrazio je nezadovoljstvo dobijenim odgovorom od BH Telekoma koji se tiče ukupnih primanja menadžmenta ovog društva u protekloj godini. Izrazio je negodovanje konstatacijom da se ovi podaci smatraju zaštićenom informacijom u skladu sa Vodičem o pristupu informacijama, te smatra da Vodič ne može imati jaču pravnu snagu od Zakona o slobodi pristupa informacijama.

**Mislav Sučić** postavio je dva pitanja.

Prvo pitanje postavio je "Elektroprivredi HZHB" u vezi sa prijenosom vlasništva nad ovim preduzećem sa općine na Federaciju.

Drugo pitanje uputio je Javnom preduzeću vodnog područja Jadranskog sliva u Mostaru u vezi sa prestankom važenja vodne dozvole Buškom Blatu, tj. kako će općine Livno i Tomislav-Grad dobiti vodnu dozvolu budući da 31. januara ove godine ističe vodna dozvola Buškom Blatu.

**Besim Imamović** postavio je tri pitanja.

Prvo pitanje je u vezi sa procentom raspodjele javnih prihoda u Federaciji Bosne i Hercegovine i dostavljanjem informacije o raspodjeli javnih prihoda po kantonima i formuli prema kojoj se ova raspodjela javnih prihoda vrši. Zatražio je od Vlade Federacije da razmotri raspodjelu javnih prihoda u Federaciji Bosne i Hercegovine.

Drugo pitanje je vezano uz poskupljenje cijena fiksne telefonije BH Telekoma.

Treće pitanje tiče se kreiranja cijena nafte i naftnih derivata, a pitanje je uputio Vladi Federacije šta čini na kontroli cijena ovih proizvoda.

**Ramo Isak** pokrenuo je inicijativu da se u svim sportskim kladionicama uvedu alarmi, videonadzori, panik-tasteri i sl. u cilju sprečavanja pljački ovih objekata.

**Kenan Keserović** postavio je tri pitanja.

Prvo pitanje uputio je Vladi Federacije i federalnom ministru poljoprivrede, vodoprivrede i šumarstva u vezi sa provedbom donesenih Zaključaka Parlamenta Federacije, a odnose se na stanje u "Agrokomercu", te šta je urađeno na njihovoj realizaciji. Zatražio je pisani odgovor na ovo pitanje.

Drugo pitanje upućeno je Federalnom ministarstvu rada i socijalne politike, Federalnom zavodu za zapošljavanje i Džender centru Federacije - upitao je da li su navedene institucije uputile preporuke institucijama iz oblasti zapošljavanja da u projekte zapošljavanja, kao posebnu ciljanu grupu, uvrste žrtve nasilja u porodici i zatražio da se u pisanom odgovoru dostavi kompletna dokumentacija u vezi sa ovim projektima.

Treće pitanje uputio je Federalnom ministarstvu obrazovanja i nauke i Džender centru Federacije, a odnosi se na to da li je direktor Gimnazije Velika Kladuša uzeo od profesorice matematike i profesora vjeronauke i sociologije izjave o određenim uredbama i da li je pokrenut disciplinski postupak za utvrđivanje odgovornosti u skladu sa Zakonom o osnovnom i srednjem obrazovanju. Zatražio je od Džender centra Federacije da se, u skladu sa Zakonom o ravnopravnosti spolova, uključi u ovaj slučaj.

**Edin Hozan** postavio je pitanje predsjednici Federacije - kada će konačno pokrenuti postupak imenovanja sudija Ustavnog suda Federacije Bosne i Hercegovine.

**Drago Puzigaća** postavio je pitanje Vladi Federacije u vezi sa realizacijom projekata u općinama Drvar, Bosansko Grahovo i Glamoč i zatražio uvažavanje opravdanih zahtjeva ovih općina.

Na ovo pitanje odgovor je dao Nail Šećkanović, federalni ministar prometa i komunikacija.

**Bojan Bošnjak** postavio je dva pitanja.

Prvo pitanje postavio je Federalnom ministarstvu poljoprivrede, vodoprivrede i šumarstva u vezi sa opstruiranjem donošenja Zakona o novčanim podrškama u poljoprivredi.

Drugo pitanje odnosi se na djelokrug rada Federalnog zavoda za poljoprivredu u Sarajevu i Federalnog agromediteranskog zavoda u Mostaru - zašto nisu uključeni u poslove poljoprivredne savjetodavne službe i uzgojno-selekcionog rada u stočarstvu.

Na ova pitanja zatražio je pisani odgovor.

Damir Ljubić, federalni ministar poljoprivrede, vodoprivrede i šumarstva, odgovorio je na ova pitanja.

**Sead Čaušević** postavio je pitanje Vladi Federacije - šta čini na sagledavanju stanja i osposobljavanju domaćih preduzeća sa ciljem ravnopravnog konkurisanja na dobijanju poslova na investicijama u infrastrukturi i elektroenergetskom sektoru i sl. Zatražio je dostavljanje informacije o tome koje su firme osposobljene a koje nisu, te da im se da podrška u kreditima od Razvojne banke Federacije.

**Tomo Vidović** pokrenuo je inicijativu i postavio pitanje.

Pokrenuo je inicijativu kojom bi Federalno ministarstvo finansija iniciralo prioritetu i cjelovitu aktivnost Agencije za nadzor i osiguranje Federacije Bosne i Hercegovine na kontroli i provjeri zakonitosti poslovanja osiguravajućih društava registriranih na području Republike Srpske i Brčko Distrikta, koji na području Tuzle i Tuzlanskog kantona imaju registrirane podružnice, a uočena su poslovna ponašanja suprotna važećim zakonima i Sporazumu o poštivanju premijskog sistema, posebno u domenu autoodgovornosti.

Postavio je pitanje Federalnom ministarstvu prometa i komunikacija a odnosi se na iznos planiranih sredstava za realizaciju Projekta petlje Šiški Brod u 2009. godini, te zašto nisu počeli radovi u 2009. godini i koliko sredstava je predviđeno za realizaciju ovog projekta u 2010. godini, te kada je planiran početak radova na realizaciji Projekta.

**Alija Begović** postavio je pitanje Vladi Federacije - da li se potrošnja javnih sredstava u javnim preduzećima i privrednim društvima u državnom vlasništvu može smatrati državnom ili nekom drugom tajnom u odnosu na članove Parlamenta Federacije. Pitao je da li Vlada Federacije ima pristup finansijskim izvještajima ovih preduzeća i može li obavijestiti članove Parlamenta kolika su ukupna primanja svih zaposlenika u ovim preduzećima za decembar 2009. godine.

Nakon postavljenih delegatskih pitanja i pokrenutih inicijativa prešlo se na utvrđivanje dnevnog reda.

Predsjedavajući je obavijestio delegate da je Vlada Federacije dostavila Prijedlog Zakona o izmjenama i dopunama Zakona o lovstvu i Prijedlog Zakona o izmjenama Zakona o sjemenu i sadnom materijalu

šumskih i hortikulturnih vrsta drveća i grmlja, sa prijedlogom da se razmatraju po skraćenom postupku.

Na osnovu rezultata glasanja, predsjedavajući je konstatovao sljedeće:

- sa 36 glasova za, uz četiri uzdržana glasa i uz jedan glas protiv, Dom naroda je prihvatio da se Prijedlog Zakona o izmjenama i dopunama Zakona o lovstvu razmatra po skraćenom postupku,
- sa 37 glasova za, uz tri uzdržana glasa i uz jedan glas protiv, Dom naroda je prihvatio da se Prijedlog Zakona o izmjenama Zakona o sjemenu i sadnom materijalu šumskih i hortikulturnih vrsta drveća i grmlja razmatra po skraćenom postupku.

Besim Imamović je predložio da se u dnevni red sjednice uvrste sljedeće tačke - Prijedlog Odluke o izmjeni Odluke o pristupanju izradi prostornog plana područja posebnih obilježja od značaja za Federaciju Bosne i Hercegovine «Autocesta na koridoru Vc» za period od 2008. do 2028. godine i Prijedlog Odluke o davanju saglasnosti za prihvaćanje kredita Evropske investicione banke za Projekt Koridor Vc- faza – sjever.

U raspravi u vezi sa ovim prijedlogom učestvovali su: predsjednik Kluba delegata hrvatskog naroda Josip Perić, federalni ministar prometa i komunikacija Nail Šećkanović, Svetozar Pudarić, Besim Imamović i Alija Begović, predsjednik Kluba delegata bošnjačkog naroda.

Budući da je Klub delegata hrvatskog naroda izrazio protivljenje uvrštavanju u dnevni red ovih odluka jer je stav Kluba da se izgradnja autocesta treba planirati na cijeloj dužini, tj. na sjevernom i južnom dijelu, bez diskriminacije hrvatskog naroda, a da je federalni ministar prometa i komunikacija Nail Šećkanović obavijestio delegate o održanom sastanku Odbora za praćenje izgradnje autoceste na Koridoru Vc, predsjednik Kluba delegata bošnjačkog naroda je zatražio pauzu.

Nakon pauze, predsjedavajući Doma naroda obavijestio je delegate da je Kolegij Doma naroda, kojem su prisustvovali premijer, zamjenik premijera i ministar Nail Šećkanović, upoznat sa zaključcima Odbora za praćenje izgradnje autoceste na Koridoru Vc, te je Kolegij predložio da se odluke ne razmatraju na ovoj sjednici dok Vlada Federacije ne uputi u parlamentarnu proceduru nove odluke koje tretiraju ovu oblast na osnovu zaključaka Odbora za nadzor realiziranja Projekta Koridor Vc, što su delegati prihvatili.

Također, predsjedavajući je obavijestio delegate u vezi sa 1. tačkom dnevnog reda - Izjašnjavanje o Prijedlogu Zakona o veterinarstvu u Federaciji Bosne i Hercegovine - da je Kolegij Doma naroda predložio da se izjašnjavanje o ovoj tački dnevnog reda odgodi do nastavka sjednice, što su delegati prihvatili.

U vezi sa ovom tačkom dnevnog reda, Klub delegata hrvatskog naroda, prije izjašnjavanja o Prijedlogu Zakona o veterinarstvu u Federaciji Bosne i Hercegovine, zatražio je da se dostavi informacija o statusu,

legalnosti i legalitetu rada Veterinarske komore Federacije Bosne i Hercegovine.

Nakon toga, predsjedavajući je konstatovao da je Dom naroda, sa 44 glasa za i uz dva uzdržana glasa, usvojio sljedeći:

## **D N E V N I R E D**

1. Izjašnjavanje o Prijedlogu Zakona o veterinarstvu u Federaciji Bosne i Hercegovine,
2. Prijedlog Zakona o izmjenama i dopunama Zakona o lovstvu – skraćeni postupak,
3. Prijedlog Zakona o izmjenama Zakona o sjemenu i sadnom materijalu šumskih i hortikulturnih vrsta drveća i grmlja – skraćeni postupak,
4. Prijedlog Zakona o cestama Federacije Bosne i Hercegovine,
5. Prijedlog Zakona o dopuni Zakona o posredovanju u privatnom osiguranju,
6. Prijedlog Zakona o krvi i krvnim sastojcima,
7. Prijedlog Zakona o unutrašnjoj trgovini,
8. Prijedlog Zakona o rudarstvu Federacije Bosne i Hercegovine,
9. Prijedlog Zakona o geološkim istraživanjima Federacije Bosne i Hercegovine,
10. Nacrt Zakona o plaćama i naknadama u organima vlasti Federacije Bosne i Hercegovine,
11. Nacrt Zakona o nasljeđivanju (predlagač: Klub zastupnika BPS - Sefer Halilović u Predstavničkom domu),
12. Nacrt Zakona o stočarstvu,
13. Nacrt Zakona o zaštiti zdravlja bilja u Federaciji Bosne i Hercegovine,
14. Nacrt Zakona o izmjenama i dopunama Zakona o sjemenu i sadnom materijalu poljoprivrednog bilja,
15. Nacrt Zakona o apotekarskoj djelatnosti,
16. Nacrt Zakona o pravima, obavezama i odgovornostima pacijenata,
17. a) Odluka o davanju saglasnosti za prihvaćanje kredita Evropske banke za obnovu i razvoj za Projekt gasifikacije Srednjobosanskog kantona,  
b) Odluka o davanju saglasnosti za zaključivanje Supsidijarnog ugovora između Bosne i Hercegovine i Federacije Bosne i Hercegovine za kredit Evropske banke za obnovu i razvoj za Projekt gasifikacije Srednjobosanskog kantona,  
c) Nacrt ugovora o podršci projektu, nacrt ugovora o sponzorskoj podršci, Nacrt ugovora o zajmu i Nacrt Supsidijarnog ugovora o zajmu,  
d) Informacija o kreditu Evropske banke za obnovu i razvoj za Projekt gasifikacije Srednjobosanskog kantona,

18. Prijedlog Odluke o davanju saglasnosti na Odluku Vlade Federacije Bosne i Hercegovine o davanju saglasnosti Federalnom pravobranilaštvu za sklapanje sudske nagodbe po tužbi AD „Progres“ Beograd,
19. Informacija o gospodarenju šumama u Federaciji Bosne i Hercegovine u 2008. godini i planovi gospodarenja šumama za 2009. godinu,
20. Prijedlog za rješenje spornih pitanja u tekstu Prijedloga Zakona o profesionalnoj rehabilitaciji, osposobljavanju i zapošljavanju lica sa invaliditetom,
21. Izbor i imenovanja.

## **2. Prijedlog Zakona o izmjenama i dopunama Zakona o lovstvu**

Prijedlog Zakona utvrdila je Vlada Federacije.

Predstavnički dom je na nastavku 27. sjednice od 7.12.2009. godine usvojio Prijedlog Zakona sa tehničkom ispravkom u članu 4. Prijedloga zakona, koju je predstavnik Vlade Federacije prihvatio.

Prijedlog Zakona razmatrala su nadležna radna tijela i dostavila svoje izvještaje.

Ispred Odbora za poljoprivredu, vodoprivredu i šumarstvo Izvještaj je obrazložio Zoran Budimić, predsjednik Odbora.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda, sa 47 glasova za i uz jedan glas protiv, usvojio Prijedlog Zakona o izmjenama i dopunama Zakona o lovstvu.

## **3. Prijedlog Zakona o izmjenama Zakona o sjemenu i sadnom materijalu šumskih i hortikulturnih vrsta drveća i grmlja**

Prijedlog Zakona utvrdila je Vlada Federacije.

Predstavnički dom je na nastavku 27. sjednice od 7.12.2009. godine usvojio Prijedlog Zakona u tekstu kako ga je predložila Vlada Federacije.

Prijedlog Zakona razmatrala su nadležna radna tijela i dostavila svoje izvještaje.

Ispred Odbora za poljoprivredu, vodoprivredu i šumarstvo Izvještaj je obrazložio Zoran Budimić, predsjednik Odbora.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda, sa 47 glasova za i uz dva uzdržana glasa, usvojio Prijedlog Zakona o izmjenama Zakona o sjemenu i sadnom materijalu šumskih i hortikulturnih vrsta drveća i grmlja.



#### **4. Prijedlog Zakona o cestama Federacije Bosne i Hercegovine**

Prijedlog Zakona utvrdila je Vlada Federacije.

Predstavnički dom je na nastavku 27. sjednice od 26.01.2010. godine usvojio Prijedlog Zakona sa osam amandmana Vlade Federacije i 18 amandmana koje je Vlada Federacije prihvatila na sjednici Predstavničkog doma i koji su postali sastavni dio Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Nail Šećkanović, federalni ministar prometa i komunikacija.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda, sa 40 glasova za, uz tri uzdržana glasa i uz dva glasa protiv, usvojio Prijedlog Zakona o cestama Federacije Bosne i Hercegovine.

#### **5. Prijedlog Zakona o dopuni Zakona o posredovanju u privatnom osiguranju**

Prijedlog Zakona utvrdila je Vlada Federacije.

Predstavnički dom je na nastavku 28. sjednice od 13.01.2010. godine usvojio Prijedlog Zakona u tekstu kako ga je predložila Vlada Federacije.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Samir Bakić, predstavnik Federalnog ministarstva finansija.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda, sa 39 glasova za, uz četiri uzdržana glasa i uz tri glasa protiv, usvojio Prijedlog Zakona o dopuni Zakona o posredovanju u privatnom osiguranju.

#### **6. Prijedlog Zakona o krvi i krvnim sastojcima**

Prijedlog Zakona utvrdila je Vlada Federacije.

Predstavnički dom je na nastavku 28. sjednice od 13.01.2010. godine usvojio Prijedlog Zakona sa amandmanom Vlade Federacije, koji je postao sastavni dio Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Safet Omerović, federalni ministar zdravstva.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda, sa 46 glasova za i uz jedan glas protiv, usvojio Prijedlog Zakona o krvi i krvnim sastojcima.

## 7. Prijedlog Zakona o unutrašnjoj trgovini

Prijedlog Zakona utvrdila je Vlada Federacije.

Predstavnički dom je na nastavku 28. sjednice od 13.01.2010. godine usvojio Prijedlog Zakona sa šest amandmana koje je Vlada Federacije prihvatila pa su postali sastavni dio Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Desnica Radivojević, federalni ministar trgovine.

U raspravi su učestvovali: Mislav Sučić, Radoje Vidović, Fahrudin Skopljak, Muhamed Osmić, Lidija Bradara i Desnica Radivojević, federalni ministar trgovine, koji je, ispred Vlade Federacije, podnio amandmane, koji su postali sastavni dio Prijedloga Zakona.

### **Amandman I**

U članu 13. stav 1) mijenja se i glasi:

„Trgovački lanci namijenjeni za trgovinu različitih robnih grupa prehrambenih i neprehrambenih proizvoda, površine od 1.000 i više kvadratnih metara mogu se graditi ili rekonstruirati, odnosno otvarati samo po prethodno pribavljenoj saglasnosti Ministarstva.“

### **Amandman II**

U članu 13. u stavu 3) alineja 2. mijenja se i glasi:

„- obaveznoj zastupljenosti u asortimanu robe domaćih prehrambenih proizvoda najmanje 50% o čemu stranka daje pisanu izjavu koju podnosi uz zahtjev iz stava 2) ovog člana,„.

### **Amandman III**

U članu 64. u stavu 1) tačka d) mijenja se i glasi:

„započne obavljati djelatnost bez saglasnosti Ministarstva (član 13. stav 1) ovog zakona) i ne dostavi izjavu o obaveznoj zastupljenosti u asortimanu robe domaćih prehrambenih proizvoda najmanje 50% (član 13. stav 3) druga alineja ovog zakona)“.

Na osnovu rezultata glasanja, predsjedavajući je konstatovao da je Dom naroda, sa 38 glasova za, uz devet uzdržanih glasova i uz dva glasa protiv, usvojio Prijedlog Zakona o unutrašnjoj trgovini.

Budući da je Prijedlog Zakona usvojen u različitom tekstu u oba doma Parlamenta Federacije Bosne i Hercegovine **potrebno ga je usaglasiti.**

## 8. Prijedlog Zakona o rudarstvu Federacije Bosne i Hercegovine

Prijedlog Zakona utvrdila je Vlada Federacije.

Predsjedavajući je podsjetio delegate da je Vlada Federacije dostavila Informaciju o izvršenju Zaključaka Doma naroda vezano uz usvajanje Prijedloga Zakona o rudarstvu Federacije BiH i Prijedloga Zakona o geološkim istraživanjima Federacije Bosne i Hercegovine.

Predstavnički dom je na nastavku 21. sjednice od 21.4.2009. godine usvojio Prijedlog Zakona sa sedam amandmana, koje je Vlada Federacije prihvatila pa su postali sastavni dio Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Stipe Buljan, predstavnik Federalnog ministarstva energije, rudarstva i industrije.

Na Prijedlog Zakona devet amandmana zajednički su podnijeli Lidija Bradara i Radoje Vidović i Igor Rajner koji je podnio devet amandmana.

U raspravi su učestvovali: Ljubo Zovko, Igor Rajner, Radoje Vidović, Lidija Bradara, Stipe Buljan, Vahid Hećo, federalni ministar energije, rudarstva i industrije, Josip Perić, Svetozar Pudarić, Edin Hozan i Alija Begović.

Budući da je Stipe Buljan izjavio da ne prihvata amandmane Lidije Bradare i Radoja Vidovića, predsjedavajući je pozvao podnosioc amandmana da se izjasne da li odustaju od amandmana.

Kako podnosioci nisu odustali od amandmana, predsjedavajući ih je dao na glasanje i konstatovao sljedeće:

- Amandman I koji se odnosi na član 7. st. 2. i 3. nije dobio potrebnu većinu glasova, jer je za glasalo 17 delegata, 26 delegata je bilo uzdržano, a šest delegata je bilo protiv,
- Amandman II koji se odnosi na član 11. stav 2. nije dobio potrebnu većinu glasova, jer je za glasalo 19 delegata, 26 delegata je bilo uzdržano, a pet delegata je bilo protiv,
- Amandman III koji se odnosi na član 13. nije dobio potrebnu većinu glasova, jer je za glasalo 18 delegata, 26 delegata je bilo uzdržano, a pet delegata je bilo protiv,
- Amandman IV koji se odnosi na član 14. st. 3. i 4. nije dobio potrebnu većinu glasova, jer je za glasalo 15 delegata, 27 delegata je bilo uzdržano, a četiri delegata je bilo protiv,
- Amandman V koji se odnosi na član 16. stav 1. nije dobio potrebnu većinu glasova,
- Amandman VI koji se odnosi na član 19. nije dobio potrebnu većinu glasova, jer je za glasalo 15 delegata, 28 delegata je bilo uzdržano, a tri delegata su bila protiv,
- Amandman VII koji se odnosi na član 21. nije dobio potrebnu većinu glasova,

- Amandman VIII koji se odnosi na član 37. st. 2. i 3. nije dobio potrebnu većinu glasova, jer je za glasalo 19 delegata, 26 delegata je bilo uzdržano, a tri delegata su bila protiv,
- Amandman IX koji se odnosi na član 91. nije dobio potrebnu većinu glasova, jer je za glasalo 17 delegata, 24 delegata su bila uzdržana, a pet delegata je bilo protiv.

Stipe Buljan izjavio je da se amandmani Igora Rajnera mogu prihvatiti kao pravno-tehničke ispravke:

- u članu 2. u tački 4. iza riječi: „privredno društvo“ dodaje se tekst: „ili posebno registriran dio privrednog društva“,
- u članu 3. dodaje se nova tačka 5. koja glasi: „5. poduzimanje potrebnih mjera za zaštitu zdravlja i sigurnosti u rudnicima, te za smanjenje uticaja rudarskih radova na okoliš,“ (dosadašnja tačka 5. postaje stav 2. ovog člana),
- u članu 13. stav 2. mijenja se i glasi: “Strategiju upravljanja mineralnim sirovinama usvaja Parlament Federacije Bosne i Hercegovine (u daljnjem tekstu: Parlament Federacije) na prijedlog Vlade Federacije Bosne i Hercegovine (u daljnjem tekstu: Vlada Federacije)”,
- u članu 26. riječi: “rudarske spremne” zamjenjuju se riječima: “u skladu sa čl. 31., 32. i 34. ovog zakona”,
- u čl. 39. i 40. u pretposljednijim tačkama riječ “i” zamjenjuje se riječju “ili”,
- u članu 43. u tački 5. riječ “službenosti” mijenja se i glasi: “služnosti”,
- u nazivu IV. Glave dodaje se tekst: “- mjere zaštite zdravlja i sigurnosti”,
- u članu 59. u stavu 4. na kraju rečenice dodaje se tekst: “i općinu na čijem se području nalazi eksploataciono polje na kojem se potpuno i trajno obustavljaju rudarski radovi”. U stavu 7. istog člana na kraju rečenice dodaje se tekst: “te predstavnici općine na čijem se području eksploataciono polje”,
- član 110. mijenja se i glasi: “Za izdavanje urbanističke saglasnosti za izgradnju ili legaliziranje izgrađenih građevinskih objekata u granicama eksploatacionog polja potrebno je prethodno pozitivno mišljenje rudarsko privrednog društva u formi i sadržaju koje će u roku od šest mjeseci od dana stupanja na snagu ovog zakona donijeti Federalno ministarstvo prostornog uređenja.  
Saglasnost iz stava 1. ovog člana može se izdati i kada rudarsko privredno društvo smatra da postoji rizik oštećenja građevinskog objekta, ali ne postoji opasnost po život i zdravlje ljudi, pod uvjetom da se investitor, odnosno vlasnik građevinskog objekta pisanom izjavom, koja se ubilježava u zemljišne knjige, odriče prava na

naknadu štete koja bi mogla nastati kao posljedica izvođenja rudarskih radova.”

Na osnovu rezultata glasanja, predsjedavajući je konstatovao da je Dom naroda, sa 34 glasa za, uz pet uzdržanih glasova i uz sedam glasova protiv, usvojio Prijedlog Zakona o rudarstvu Federacije Bosne i Hercegovine.

## **9. Prijedlog Zakona o geološkim istraživanjima Federacije Bosne i Hercegovine**

Prijedlog Zakona utvrdila je Vlada Federacije.

Predsjedavajući je podsjetio delegate da je Vlada Federacije dostavila Informaciju o izvršenju Zaključaka Doma naroda vezano uz usvajanje Prijedloga Zakona o rudarstvu Federacije Bosne i Hercegovine i Prijedloga Zakona o geološkim istraživanjima Federacije Bosne i Hercegovine.

Predstavnički dom je na nastavku 21. sjednice od 21.4.2009. godine usvojio Prijedlog Zakona sa dva amandmana koje je Vlada Federacije prihvatila pa su postali sastavni dio Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Na Prijedlog Zakona amandman je podnijela Elvira Abdić-Jelenović.

Prijedlog Zakona obrazložio je Stipe Buljan, predstavnik Federalnog ministarstva energije, rudarstva i industrije, izjavio je da ne prihvata amandman Elvire Abdić-Jelenović.

U raspravi nije niko učestvovao.

Budući da Vlada nije prihvatila amandman Elvire Abdić-Jelenović, predsjedavajući ga je dao na glasanje i konstatovao da amandman koji se odnosi na član 42. nije dobio potreban broj glasova, jer je za glasalo 16 delegata, 19 delegata je bilo uzdržano, a 11 delegata je bilo protiv.

Na osnovu rezultata glasanja, predsjedavajući je konstatovao da je Dom naroda, sa 39 glasova za, uz četiri uzdržana glasa i uz šest glasova protiv, usvojio Prijedlog Zakona o geološkim istraživanjima Federacije Bosne i Hercegovine.

## **10. Nacrt Zakona o plaćama i naknadama u organima vlasti Federacije Bosne i Hercegovine**

Nacrt Zakona utvrdila je Vlada Federacije.

Predstavnički dom je na nastavku 28. sjednice od 13.1.2010. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Feliks Vidović, federalni ministar pravde.

U raspravi su učestvovali: Igor Rajner, Saša Magazinović, Mirsad Pindžo, Svetozar Pudarić, Snježana Milavić, Lidija Bradara, Mislav Sučić, Alija Begović, Tomo Vidović, Ljubo Zovko, Besim Imamović i Besim Spahić.

Na osnovu rezultata glasanja, predsjedavajući je konstatovao da je Dom naroda, sa 36 glasova za, uz dva uzdržana glasa i uz deset glasova protiv, usvojio sljedeći:

## **ZAKLJUČAK**

1. Dom naroda Parlamenta Federacije Bosne i Hercegovine prihvaća Nacrt Zakona o plaćama i naknadama u organima vlasti Federacije Bosne i Hercegovine i smatra da može poslužiti kao osnov za izradu prijedloga Zakona.
2. Zadužuje se Vlada Federacije BiH da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

### **11. Nacrt Zakona o nasljeđivanju**

Predlagač ovog Nacrta zakona je Klub zastupnika BPS - Sefer Halilović u Predstavničkom domu.

Predstavnički dom je na nastavku 25. sjednice od 20.10.2009. godine razmatrao Nacrt Zakona i Zaključkom ga prihvatio.

Nacrt Zakona proslijeđen je Vladi Federacije radi davanja mišljenja.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Ibro Omerbašić, predstavnik Kluba zastupnika BPS - Sefer Halilović u Predstavničkom domu.

Nakon izlaganja predlagača Feliks Vidović, federalni ministar pravde, predložio je da Vlada Federacije bude predlagač Prijedloga Zakona.

U raspravi su učestvovali: Tomo Vidović, Ljubo Zovko, Mira Jurić, Sead Čaušević, Josip Perić, Feliks Vidović, federalni ministar pravde, i Ibro Omerbašić, koji je prihvatio da Vlada Federacije utvrdi Prijedlog Zakona.

Na osnovu rezultata glasanja, predsjedavajući je konstatovao da je Dom naroda, sa 38 glasova za, uz tri uzdržana glasa i uz jedan glas protiv, usvojio sljedeći:

## **ZAKLJUČAK**

1. Dom naroda Parlamenta Federacije Bosne i Hercegovine prihvaća Nacrt Zakona o nasljeđivanju i smatra da može poslužiti kao osnov za izradu prijedloga Zakona.

2. Zadužuje se Vlada Federacije Bosne i Hercegovine da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

Nakon toga predsjedavajući je predložio da se razmotre 17. i 18. tačka dnevnog reda, a da se ostale tačke razmatraju na nastavku sjednice, što su delegati prihvatili.

- 17. a) Odluka o davanju saglasnosti za prihvaćanje kredita Evropske banke za obnovu i razvoj za Projekt gasifikacije Srednjobosanskog kantona**
- b) Odluka o davanju saglasnosti za zaključivanje Supsidijarnog ugovora između Bosne i Hercegovine i Federacije Bosne i Hercegovine za kredit Evropske banke za obnovu i razvoj za Projekt gasifikacije Srednjobosanskog kantona**
- c) Nacrt ugovora o podršci projektu, nacrt ugovora o sponzorskoj podršci, Nacrt ugovora o zajmu i Nacrt supsidijarnog ugovora o zajmu**
- d) Informacija o kreditu Evropske banke za obnovu i razvoj za Projekt gasifikacije Srednjobosanskog kantona**

Odluke je donijela Vlada Federacije i dostavila ih Parlamentu Federacije radi razmatranja i odobrenja.

Predstavnički dom je na nastavku 28. sjednice od 13.1.2010. godine, odobrio odluke.

Odluke su razmatrala nadležna radna tijela i dostavila svoje izvještaje.

U raspravi su učestvovali: Igor Rajner, Samir Bakić, predstavnik Federalnog ministarstva finansija, Svetozar Pudarić, Edin Hozan i Ivo Komšić.

Potom se prešlo na glasanje o odlukama

- a) Odluka o davanju saglasnosti za prihvaćanje kredita Evropske banke za obnovu i razvoj za Projekt gasifikacije Srednjobosanskog kantona**

Na osnovu rezultata glasanja, predsjedavajući je konstatovao da je Dom naroda, sa 40 glasova za, uz tri uzdržana glasa i uz četiri glasa protiv, donio Odluku kojom je odobrio Odluku o davanju saglasnosti za prihvaćanje kredita Evropske banke za obnovu i razvoj za Projekt gasifikacije Srednjobosanskog kantona.

**b) Odluka o davanju saglasnosti za zaključivanje Supsidijarnog ugovora između Bosne i Hercegovine i Federacije Bosne i Hercegovine za kredit Evropske banke za obnovu i razvoj za Projekt gasifikacije Srednjobosanskog kantona**

Na osnovu rezultata glasanja, predsjedavajući je konstatovao da je Dom naroda, sa 39 glasova za, uz tri uzdržana glasa i uz dva glasa protiv, donio Odluku kojom je odobrio Odluku o davanju saglasnosti za zaključivanje Supsidijarnog ugovora između Bosne i Hercegovine i Federacije Bosne i Hercegovine za kredit Evropske banke za obnovu i razvoj za Projekt gasifikacije Srednjobosanskog kantona.

Dom naroda je primio na znanje Nacrt ugovora o podršci projektu, nacrti ugovora o sponzorskoj podršci, Nacrt ugovora o zajmu i Nacrt supsidijarnog ugovora o zajmu i Informaciju o kreditu Evropske banke za obnovu i razvoj za Projekt gasifikacije Srednjobosanskog kantona.

**18. Prijedlog Odluke o davanju saglasnosti na Odluku Vlade Federacije Bosne i Hercegovine o davanju saglasnosti Federalnom pravobranilaštvu za sklapanje sudske nagodbe po tužbi AD „Progres“ Beograd**

Vlada Federacije donijela je Odluku o davanju saglasnosti Federalnom pravobranilaštvu za sklapanje sudske nagodbe po tužbi AD “Progres” Beograd i dostavila je Parlamentu Federacije radi razmatranja i davanja saglasnosti.

Novi tekst Odluke dostavljen je 12.1.2010. godine u kojoj je dodana nova tačka V.

Predstavnički dom je na nastavku 27. sjednice od 12.1.2010. godine dao saglasnost na novi tekst Odluke.

Odluku su razmatrala nadležna radna tijela i dostavila svoje izvještaje. U raspravi je učestvovala Lidija Bradara.

Na osnovu rezultata glasanja, predsjedavajući je konstatovao da je Dom naroda, sa 44 glasa za, uz dva uzdržana glasa i uz dva glasa protiv, donio Odluku o davanju saglasnosti na Odluku Vlade Federacije Bosne i Hercegovine o davanju saglasnosti Federalnom pravobranilaštvu za sklapanje sudske nagodbe po tužbi AD “Progres” Beograd.

Sjednica je prekinuta u 16.29.

\* \* \*



## NASTAVAK SJEDNICE OD 11. FEBRUARA 2010. GODINE

Sjednica je počela u 10.44.

Sjednici je predsjedavao Stjepan Krešić, predsjedavajući Doma naroda Parlamenta Federacije Bosne i Hercegovine.

Na početku sjednice predsjedavajući je pozdravio: delegate, ministre u Vladi Federacije, predstavnike udruženja međunarodnih organizacija i akreditiranih medija koji prate rad sjednice.

Izostanak sa sjednice opravdali su: Jasenko Tufekčić, Zijad Tvica, Kenan Keserović, Slobodan Tomić, Bojan Bošnjak i Ramo Isak.

Na osnovu evidencije Stručne službe, predsjedavajući je konstatovao da sjednici prisustvuju 42 delegata, što čini većinu, te Dom naroda može raditi i punovažno odlučivati.

Predsjedavajući je podsjetio delegate na preostale tačke dnevnog reda i prešao na rad.

### 12. Nacrt Zakona o stočarstvu

Nacrt Zakona utvrdila je Vlada Federacije.

Predstavnički dom je na nastavku 27. sjednice od 8.12.2009. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Damir Ljubić, federalni ministar poljoprivrede, vodoprivrede i šumarstva.

Ispred Odbora za poljoprivredu, vodoprivredu i šumarstvo Izvještaj je obrazložio Zoran Budimić, predsjednik Odbora.

U raspravi je učestvovao Tomo Vidović.

Na osnovu rezultata glasanja, predsjedavajući je konstatovao da je Dom naroda jednoglasno (39 glasova) usvojio sljedeći:

### ZAKLJUČAK

1. Dom naroda Parlamenta Federacije Bosne i Hercegovine prihvća Nacrt Zakona o stočarstvu i smatra da može poslužiti kao osnov za izradu prijedloga Zakona.
2. Zadužuje se Vlada Federacije BiH da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

### **13. Nacrt Zakona o zaštiti zdravlja bilja u Federaciji Bosne i Hercegovine**

Nacrt Zakona utvrdila je Vlada Federacije.

Predstavnički dom je na nastavku 28. sjednice od 13.1.2010. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Nijaz Brković, pomoćnik federalnog ministra poljoprivrede, vodoprivrede i šumarstva.

Ispred Odbora za poljoprivredu, vodoprivredu i šumarstvo Izvještaj je obrazložio Zoran Budimić, predsjednik Odbora.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda jednoglasno (43 glasa) usvojio sljedeći:

#### **ZAKLJUČAK**

Dom naroda Parlamenta Federacije Bosne i Hercegovine prihvaća Nacrt Zakona o zaštiti zdravlja bilja u Federaciji Bosne i Hercegovine i smatra da može poslužiti kao osnov za izradu prijedloga Zakona.

### **14. Nacrt Zakona o izmjenama i dopunama Zakona o sjemenu i sadnom materijalu poljoprivrednog bilja**

Nacrt Zakona utvrdila je Vlada Federacije.

Predstavnički dom je na nastavku 27. sjednice od 8.12.2009. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Nijaz Brković, pomoćnik federalnog ministra poljoprivrede, vodoprivrede i šumarstva.

Ispred Odbora za poljoprivredu, vodoprivredu i šumarstvo Izvještaj je obrazložio Zoran Budimić, predsjednik Odbora.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda jednoglasno (38 glasova) usvojio sljedeći:

#### **ZAKLJUČAK**

Dom naroda Parlamenta Federacije Bosne i Hercegovine prihvaća Nacrt Zakona o izmjenama i dopunama Zakona o sjemenu i sadnom materijalu poljoprivrednog bilja.

## **15. Nacrt Zakona o apotekarskoj djelatnosti**

Nacrt Zakona utvrdila je Vlada Federacije.

Predstavnički dom je na nastavku 28. sjednice od 13.1.2010. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Safet Omerović, federalni ministar zdravstva.

U raspravi su učestvovali: Mira Ljubijankić, Igor Rajner, Snježana Milavić, Drago Puzigaća, Besim Imamović, Ljubo Zovko, Josip Perić, Zoran Budimić, Emir Frašto, Safet Omerović, federalni ministar zdravstva i Snježana Bodnaruk, pomoćnica federalnog ministra zdravstava.

Na osnovu rezultata glasanja, predsjedavajući je konstatovao da je Dom naroda većinom glasova (37 glasova za i jedan uzdržani glas) usvojio sljedeći:

### **ZAKLJUČAK**

1. Dom naroda Parlamenta Federacije Bosne i Hercegovine prihvata Nacrt Zakona o apotekarskoj djelatnosti i smatra da može poslužiti kao osnov za izradu prijedloga Zakona.
2. Zadužuje se Vlada Federacije BiH da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

## **16. Nacrt Zakona o pravima, obavezama i odgovornostima pacijenata**

Nacrt Zakona utvrdila je Vlada Federacije.

Predstavnički dom je na nastavku 28. sjednice od 13.1.2010. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Safet Omerović, federalni ministar zdravstva.

U raspravi su učestvovali: Mira Ljubijankić, Tomo Vidović, Igor Rajner, Muhamed Osmić, Alija Begović, Lidija Bradara, Zoran Budimić, Dragomir Bilić, Svetozar Pudarić, Emir Frašto i Safet Omerović, federalni ministar zdravstva.

Na osnovu rezultata glasanja, predsjedavajući je konstatovao da je Dom naroda većinom glasova (35 glasova za i jedan uzdržani glas) usvojio sljedeći:

## ZAKLJUČAK

1. Dom naroda Parlamenta Federacije Bosne i Hercegovine prihvaća Nacrt Zakona o pravima, obavezama i odgovornostima pacijenata i smatra da može poslužiti kao osnov za izradu prijedloga Zakona.
2. Zadužuje se Vlada Federacije BiH da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

### **19. Informacija o gospodarenju šumama u Federaciji Bosne i Hercegovine u 2008. godini i planovi gospodarenja šumama za 2009. godinu**

Informaciju je utvrdila Vlada Federacije.

Predstavnički dom je na nastavku 26. sjednice od 1.12.2009. godine razmatrao Informaciju i primio je na znanje.

Informaciju su razmatrala nadležna radna tijela i dostavila svoje izvještaje.

Informaciju je obrazložio Damir Ljubić, federalni ministar poljoprivrede, vodoprivrede i šumarstva.

U raspravi su učestvovali: Besim Imamović, Edin Hozan, Lidija Bradara, Mladen Lonić, Muhamed Osmić, Mira Ljubijankić, Josip Perić, Damir Ljubić, federalni ministar poljoprivrede, vodoprivrede i šumarstva, Alija Begović, Mislav Sučić i Ljubo Zovko.

Nakon toga, predsjedavajući je konstatovao da je Dom naroda primio na znanje Informaciju o gospodarenju šumama u Federaciji Bosne i Hercegovine u 2008. godini i planovima gospodarenja šumama za 2009. godinu i na prijedlog Josipa Perića, Lidije Bradere i Edina Hozana usvojio sljedeće:

## ZAKLJUČKE

1. Zadužuje se Vlada Federacije Bosne i Hercegovine da u roku od 30 dana Parlamentu Federacije Bosne i Hercegovine dostavi Informaciju o gospodarenju šumama i stanju u šumarstvu u 2009. godini.
2. Zadužuje se Vlada Federacije Bosne i Hercegovine da u roku od 30 dana Domu naroda Parlamenta Federacije Bosne i Hercegovine dostavi Informaciju o stanju gospodarstva (u javnom i privatnom sektoru) u Federaciji Bosne i Hercegovine radi održavanja tematske sjednice Doma naroda Parlamenta Federacije Bosne i Hercegovine.

## **20. Prijedlog za rješenje spornih pitanja u tekstu Prijedloga Zakona o profesionalnoj rehabilitaciji, osposobljavanju i zapošljavanju lica sa invaliditetom**

Novi prijedlog za rješenje spornih pitanja u Prijedlogu Zakona utvrdila je Zajednička komisija za usaglašavanje različito usvojenih tekstova zakona u oba doma Parlamenta Federacije.

Predstavnički dom je na nastavku 27. sjednice od 12.1.2010. godine prihvatio Prijedlog za rješenje spornih pitanja i usvojio izmijenjen Amandman I. koji se odnosi na član 29. i izmijenjen Amandman III. koji se odnosi na član 51. stav 1. alineja 4.

Tom prilikom usvojio se i Zaključak koji je predložila Zajednička komisija.

Zajednička komisija predložila je Domu naroda da usvoji izmijenjene amandmane I. i III. i Amandman II. u tekstu kako ga je usvojio Predstavnički dom, kao i Zaključak koji je predložila Zajednička komisija.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda, sa 33 glasa za i uz tri uzdržana glasa, usvojio Prijedlog za rješenje spornih pitanja u tekstu Prijedloga Zakona o profesionalnoj rehabilitaciji, osposobljavanju i zapošljavanju lica sa invaliditetom tako što je usvojio izmijenjene amandmane I. i III. i Amandman II. koji glase:

### **Amandman I.**

Član 29. mijenja se i glasi:

“Član 29.

Status zaštitne radionice ostvaruje privredno društvo za zapošljavanje lica sa invaliditetom, ako u odnosu na ukupan broj zaposlenih zapošljava 40% lica sa najmanje 70% i više invaliditeta, a najmanje šest lica sa takvim invaliditetom i 20% lica sa 100% invaliditetom, a najmanje tri lica sa takvim invaliditetom, koja u skladu sa Zakonom ostvaruju pravo na pomoć i njegu od drugog lica.”

### **Amandman II.**

U članu 50. iza stava 1. dodaje se novi stav 2. koji glasi:

“Ugovorni organ obavezno primjenjuje preferencijalni tretman od 20% ukupnih uvjeta tendera u skladu sa Zakonom o javnim nabavkama.”

Dosadašnji stav 2. postaje stav 3.

### **Amandman III.**

U članu 51. u stavu 1. alineja 4. mijenja se i glasi:

“- poreza na dohodak”.

Dom naroda je usvojio i sljedeći

## ZAKLJUČAK

Zadužuju se Odbor za rad i socijalnu zaštitu Predstavničkog doma i Odbor za boračka i invalidska pitanja, rad, zdravstvenu i socijalnu zaštitu Doma naroda da zajedno sa Federalnim ministarstvom rada i socijalne politike, prate primjedbu Zakona o profesionalnoj rehabilitaciji, osposobljavanju i zapošljavanju lica sa invaliditetom i u roku od šest mjeseci predlože eventualne izmjene i dopune Zakona.

### 21. Izbor i imenovanja

#### **Prijedlog Odluke o izmjenama i dopunama Odluke o formiranju Parlamentarne komisije odgovorne za reviziju**

Prijedlog Odluke utvrdila je Komisija za izbor i imenovanja Doma naroda.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda, sa 33 glasa za i uz dva uzdržana glasa, donio Odluku o izmjenama i dopunama Odluke o formiranju Parlamentarne komisije odgovorne za reviziju.

\* \* \*

Sjednica je završena u 14.19.

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAVALAČI

Stjepan Krešić